

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>





十一經同卷



清刻龍藏佛說法變相圖

十一經同卷

五陰譬喻經

佛說水沫所漂經

佛說不自守意經

佛說滿願子經

慶十

轉法輪經

佛說三轉法輪經

佛說八正道經

難提釋經

佛說馬有三相經

佛說馬有八態譬人經

佛說相應相可經

慶十

五陰譬喻經

後漢安息國三藏法師安世高譯

聞如是一時佛遊於靡勝國度河津見中大沫聚隨水流即告比丘言諸比丘譬如此大沫聚隨水流目士見之觀視省察即知非有虛無不實速消歸盡所以者何沫無強故如是比丘一切所色去來現在內外麤細好醜遠近比丘見此當熟省視觀其不有虛無不實但病但結但瘡但偽非真非常為苦為空為非身為消盡所以者何色之性無有強譬如比丘丘天雨滴水一泡適起一泡即滅目士見之觀視省察即知非有虛無不實速消歸盡所以者何泡無強故如是比丘一切所痛去來現在內外麤細好醜遠近比丘見知當熟省視觀其不有虛無不實但病但結但偽

但瘡非真非常為苦為空為非身為消盡所以者何痛之性無有強譬如比丘季夏盛熱日中之燄目士見之觀視省察即知非有虛無不實速消歸盡所以者何燄無強故如是比丘一切所想去來現在內外麤細好醜遠近比丘見是當熟省視觀其不有虛無不實但婬但結但瘡但偽非真非常為苦為空為非身為消盡所以者何想之性無有強譬如比丘人求良材擔斧入林見大芭蕉鴻直不曲因斷其本斬其末擘其葉理分分皮而解之中了無心何有牢固目士見之觀視省察即知非有虛無不實速消歸盡所以者何彼芭蕉無強故如是比丘一切所行去來現在內外麤細好醜遠近比丘見此當熟省視知其不有虛無不實但婬但結但瘡但偽非真

摩十

二

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



非常為苦為空為非身為消盡所以者何行之性無有強譬如比丘幻師與幻弟子於四衢道大人眾中現若干幻化作羣象羣馬車乘步從目士見之觀視省察即知不有虛無不實無形化盡所以者何幻無強故如是比丘一切所識去來現在內外麤細好醜遠近比丘見此當熟省視觀其不有虛無不實但姪但結但瘡但偽非真非常為苦為空為非身為消盡所以者何識之性無有強於是佛說偈言

沫聚喻於色 痛如水中泡 想譬熱時燄
 行為若芭蕉 夫幻喻如識 諸佛說若此
 當為觀是要 熟省而思惟 空虛之為審
 不覩其有常 欲見陰當爾 直智說皆然
 三事斷絕時 知身無所直 命氣溫煖識

捨身而轉逝 當其死卧地 猶草無所知
 觀其狀如是 但幻而愚貪 正正為無安
 亦無有牢強 知五陰如此 比丘宜精進
 是以當晝夜 自覺念正智 受行寂滅道
 行除最安樂

佛說如是比丘聞皆歡喜

五陰譬喻經

佛說水沫所漂經

東晉三藏竺曇無蘭譯

聞如是一時婆伽婆在阿迎闍波斯匿王所造觀也恒

水側與大比丘眾五百人俱時有大聚沫為

水所漂世尊見已告諸比丘汝等頗見此沫

聚為恒水所漂不諸比丘對曰如是世尊世

尊告曰此沫聚若有目士諦觀察之思惟分

別彼人見已觀諦空無所察之思惟分別空

無有無來無往亦不堅固此水聚沫何可依

怙如是諸所有色過去當來現在若麤若細

若遠若近彼有目士諦觀察之思惟分別彼

人見已諦觀察之思惟分別空無所有無來

無往空無所有亦不堅固此色陰有何堅固

譬如夏雨有泡現或有生者或有滅者彼有

目士諦觀察之思惟分別彼人已見諦觀察

之思惟分別空無所有無來無往亦不堅固

猶如此水泡有何堅固如是此身中痛當來

過去現在若麤若細若好若醜若遠若近彼

有目士諦觀察之思惟分別彼已觀察思惟

分別覺知空無所有無來無往亦不堅固此

陰中有何堅固譬若夏後日日正中無有雲

曠野馬熾盛彼有目士而觀察之思惟分別

彼已觀察思惟分別則覺知空無所有無來

無往亦不堅固此野馬有何堅固如是諸所

有想過去當來現在若麤若細若好若醜若

遠若近彼有目士而觀察之思惟分別彼已

觀察思惟分別空無所有無來無往亦無堅

固此想陰中有何堅固譬如有人從城郭村

落出求堅固彼器便往大叢樹中若見芭蕉

樹生茂盛好人見者歡喜獨生無枝葉若斷

其根作三四段在處皮處皮剝却欲求實不可得況欲得堅固彼有目士諦觀察思惟分別彼已觀察思惟分別空無所有無來無往亦不堅固此芭蕉樹有何堅固如是諸所有行過去當來現在若麤若細若好若醜若遠若近彼有目士而觀察之思惟分別彼已觀察思惟分別覺知空無所有無來無往亦不堅固此行陰有何堅固譬如點慧幻師及幻師弟子在眾人前白現幻術若有目士諦觀察思惟分別彼已觀察思惟分別空無所有無來無往亦不堅固此幻術有何堅固如是諸所有識過去當來現在若麤若細若好若醜若遠若近彼有目士而諦觀察思惟分別彼已觀察思惟分別空無所有無來無往亦不堅固此識陰有何堅固爾時世尊便說偈

言

色如彼聚沫 痛如彼水泡 想如夏野馬
 行如芭蕉樹 識如彼幻術 最勝之所說
 若能諦觀察 思惟而分別 空亦無所有
 若能作是觀 諦察此身中 大智之所說
 當滅此三法 能捨除去色 此行亦如是
 幻師不真術
 爾時諸比丘聞佛所說歡喜奉行

佛說水沫所漂經

佛說不自守意經

吳月支優婆塞支謙譯

聞如是一時佛在舍衛國祇樹給孤獨園佛告諸比丘比丘應唯然佛言聽說自守亦不自守比丘便叉手從佛聽佛告比丘幾因緣不自守若眼根不閉守若眼識墮色意便泆已意泆便更苦已更苦便不得定意已不得定意便不知至誠如有已不知便不見如有已不知已不見如有便不捨結亦不度疑已不捨結不度疑便屬他因緣異知已異知便苦不安隱如是說耳亦爾鼻亦爾口亦爾身亦爾意亦爾如是行名為不自守佛復告比丘幾因緣自守若眼根自守止眼識不墮色意便不泆已意不泆便更樂已更樂便得定意已得定意便諦如有知諦如有見已諦如

知諦如見便捨結亦度疑便不信不至誠便慧智便意樂安隱六根亦如是說如是名為自守所說自守不自守如是佛說如是皆歡喜受

佛說不自守意經

佛說滿願子經

失譯人名今附東晉經

聞如是一時佛遊摩鳩羅無種山中與大比丘俱比丘五百爾時賢者邠耨耨時從宴坐起往詣佛所偏袒右肩右膝著地稽首足下

叉手白佛善哉世尊為我且講要法我當奉行令身長夜安隱無極佛言諦聽善思念之邠耨應唯然世尊佛告邠耨耨目見好色可眼之物所可愛樂貪欲之耳貪好聲鼻識好香舌知美味身著細滑更樂可意愛於所欲慕於貪求假使比丘欣樂然可心處其心中已貪住則樂迷惑從是致患憂惱之感假使邠耨比丘目見色者可眼之物不以歡樂心不處中疾患則除耳鼻口身意亦復如是是為粗舉要法佛之教誨以誠勅汝今欲所遊邠

耨白佛唯然世尊有一國名首那和蘭此言勝欲遊彼國佛言彼國克惡志懷麤穢不能柔和喜鬪亂人假使彼國異心克人罵詈毀辱當云何乎假使彼國異心惡人罵詈辱我我當心念愛我敬我尚原赦我手不扠我佛言假使扠汝當柰之何邠耨白曰當心念言尚復愛我敬我賢善柔和不以瓦石而打擲我佛言假使以瓦石打擲汝當柰之何邠耨白曰其國人善仁和溫雅不以刀杖傷擊我身佛言假使刀杖傷擊汝身當柰之何邠耨白曰我當念言其國仁善柔和溫雅不以利刀害我身命佛言假使利刀害汝身命當柰之何邠耨白曰我當心念言身有六情為之所患厭身眾累不淨流出求刀為食志唯在味入於寂然以刀為食佛言善哉邠耨汝能

堪任以是比像調順寂然忍辱仁賢處於彼國隨意所欲於是邠耨即從座起稽首佛足右繞三匝自詣其室即夜蓋藏床卧衣服明且著衣持鉢往詣彼國尋在其國於一夏中教化勸立諸清信士凡五百人清信女五百人興于寺舍五百屋室床榻五百及法坐具被枕各各五百化五百人皆爲沙門在於其歲證三達尋滅度滅度未久諸比丘衆無央數千往詣佛所稽首足下却在^八一面俱白佛言有一比丘名曰邠耨佛爲粗舉說其要法今已滅度已來未久爲何所獲得何證乎佛言諸比丘彼族姓子已興三達證得六通諦觀順法無與等者不與餘事唯講法典諸漏已盡無復塵垢已度想念脫于智慧現在於法極達諸通證具足於生死已斷稱譽梵行

所作已辦鮮名色本諸慧無上聖智具足已得羅漢於時世尊莫不稱譽咨嗟無極邠耨文陀尼子佛說如是比丘莫不歡喜

佛說滿願子經

轉法輪經

後漢安息國三藏法師安世高譯

聞如是一時佛在波羅柰國鹿野樹下坐時有千比丘諸天神皆大會罽塞空中於是有自然法輪飛來當佛前轉佛以手撫輪曰止往者吾從無數劫來爲名色轉更苦無量今者癡愛之意已止漏結之情已解諸根已定生死已斷不復轉於五道也輪即止於是佛告諸比丘世間有二事墮邊行行道弟子捨家者終身不當與從事何等二九一爲念在貪欲無清淨志二爲倚著愛不能精進是故退邊行不得值佛道德真人若此比丘不念貪欲著身愛行可得受中如來最正覺得眼得慧從兩邊度自致泥洹何謂受中謂受八直之道一曰正見二曰正思三曰正言四曰正

行五曰正命六曰正治七曰正念八曰正定若諸比丘本未聞道當已知甚苦爲真諦已一心受眼受禪思受慧見覺所念令意解當知甚苦集盡爲真諦已受眼觀禪思慧見覺所念令意解如是盡真諦何謂爲苦謂生老苦病苦憂悲惱苦怨憎會苦所愛別苦求不得苦要從五陰受盛爲苦何謂苦集謂從愛故而令復有樂性不離在在貪喜欲愛色愛不色之愛是集爲苦何謂苦盡謂覺從愛復有所樂婬念不愛不念無餘無婬捨之無復禪如是爲集盡何謂苦集盡欲受道謂受行八直道正見正思正言正行正命正治正志正定是爲苦集盡受道真諦也又是比丘苦爲真諦苦由集爲真諦苦集盡爲真諦苦集盡欲受道爲真諦若本在昔未聞是法者當

受眼觀禪行受慧見受覺念令意得解若令
在斯未聞是四諦法者當受道眼受禪思受
慧覺令意得解若諸在彼不得聞是四諦法
者亦當受眼受禪受慧受覺令意得解是爲
四諦三轉合十二事知而未淨者吾不與也
一切世間諸天人民若梵若魔沙門梵志自
知證已受行戒定慧解受知見成是爲四極
是生後不復有長離世間無復憂患佛說是
時賢者阿若拘鄰等及八十婁天皆遠塵離
垢諸法眼生其千比丘漏盡意解皆得羅漢
及上諸集法應當盡者一切皆轉衆祐法輪
聲三轉諸天世間在法地者莫不遍聞至于
第一四天王忉利天燄摩天兜術天不驕樂
天化應聲天至諸梵界須臾遍聞爾時佛界
三千日月萬二千天地皆大震動是爲佛衆

祐始於波羅柰以無上法輪轉未轉者照無
數度諸天人從是得道佛說是已皆大歡喜

轉法輪經

佛說三轉法輪經

唐三藏法師義淨奉 詔譯

如是我聞一時薄伽梵在婆羅痾斯仙人墮處施鹿林中爾時世尊告五苾芻曰汝等苾芻此苦聖諦於所聞法如理作意能生眼智明覺汝等苾芻此苦集苦滅順苦滅道聖諦之法如理作意能生眼智明覺汝等苾芻此苦聖諦是所了法如是應知於所聞法如理作意能生眼智明覺汝等苾芻此苦集聖諦是所了法如是應斷於所聞法如理作意能生眼智明覺汝等苾芻此苦滅聖諦是所了法如是應證於所聞法如理作意能生眼智明覺汝等苾芻此順苦滅道聖諦是所了法如是應修於所聞法如理作意能生眼智明覺汝等苾芻此苦聖諦是所了法如是已知

於所聞法如理作意能生眼智明覺汝等苾芻此苦集聖諦是所了法如是已斷於所聞法如理作意能生眼智明覺汝等苾芻此苦滅聖諦是所了法如是已證於所聞法如理作意能生眼智明覺汝等苾芻此順苦滅道聖諦是所了法如是已修於所聞法如理作意能生眼智明覺汝等苾芻若我於此四聖諦法未了三轉十二相者眼智明覺皆不得生我則不於諸天魔梵沙門婆羅門一切世間捨離煩惱心得解脫不能證得無上菩提汝等苾芻由我於此四聖諦法解了三轉十二相故眼智明覺皆悉得生乃於諸天魔梵沙門婆羅門一切世間捨離煩惱心得解脫便能證得無上菩提爾時世尊說是法時具壽儁陳如及八萬諸天遠塵離垢得法眼淨

佛告憍陳如汝解此法不答言已解世尊汝
解此法不答言已解善逝由憍陳如解了法
故因此即名阿若憍陳如阿若是義是時地居
藥叉聞佛說已出大音聲告人天曰仁等當
知佛在婆羅痾斯仙人墮處施鹿林中廣說
三轉十二行相法輪由此能於天人魔梵沙
門婆羅門一切世間爲大饒益令同梵行者
速至安隱涅槃之處人天增盛阿蘇羅減少
由彼藥叉作如是告虛空諸天四大王衆皆
悉聞知如是展轉於刹那頃盡六欲天須臾
之間乃至梵天普聞其響梵衆聞已復皆遍
告廣說如前因名此經爲三轉法輪時五苾
芻及人天等聞佛說已歡喜奉行

佛說三轉法輪經

佛說八正道經

後漢安息國三藏法師安世高譯

聞如是一時佛在舍衛國祇樹給孤獨園佛告諸弟子聽我說邪道亦說正道何等為邪道不諦見不諦念不諦語不諦治不諦求不諦行不諦意不諦定是為道八邪行何等為道八正行一者諦見諦見為何等信布施信禮信祠信善惡行自然福信父母信天下道人信求道信諦行信諦受今世後世自黠得證自成便相告說是為諦見第二諦念為何等所意棄欲棄家不瞋恚怒不相侵為諦念第三諦語為何等不兩舌不傳語不惡罵不妄語是為諦語第四諦行為何等不殺盜淫是為諦行第五諦受為何等是聞有道弟子法求不可非法飯食牀卧病瘦正法求不可

非法是為諦受第六諦治為何等生死意共合行所精進行出力因緣得乃精進不歇意持是為諦治第七諦意為何等生死行合意念向意念不妄不共意求是名為諦意第八諦定為何等生死意合念止相止護已止聚止不可為不作所有罪不墮中避是名為諦定比丘所有道弟子當受是八種行諦道如說行可得道八行覺諦見者信布施後世得具福信禮者見沙門道人作禮福信祠者懸繒燒香散華然燈信所行十善是為自然得福信父母者信孝順信天下道人者喜受經信求道者為行道信諦行者斷惡意信諦受者不犯戒今世後世自黠為得黠能教人得證自成者能成人能成他人便相告說是名為諦見知如是便自脫亦脫他人第二諦念

所意起者爲失意欲棄家者爲念道不瞋恚
怒者爲忍辱不相侵者當正意第三諦語者
不惡罵不犯口四過但說至誠道品諦要第
四諦行者不殺盜婬而行誠信第五不墮貪
者但求一衣一食爲賤賢第六諦治者爲向
三十七品經第七諦意者日增三十七品經
不離意第八止者不妄因緣止者常還意護
已止者一切無所犯聚止者得福道佛說如
是皆歡喜受

佛說八正道經

難提釋經

西晉三藏法師法炬譯

聞如是一時佛行在俱舍梨國樹名尼拘類
是時多聚會比丘在迦梨講堂樹間會坐為
佛作衣今佛不久夏竟夏已盡佛自說三月

已竟作衣已當到多人處彼難提釋聞多聚

慶十

十四

會比丘在迦梨講堂樹間會坐為佛作衣今
佛不久夏竟夏已盡佛自說三月已竟作衣
已當到多人處難提釋已聞如是便到佛所
已到為佛足禮便坐一處已坐難提釋白佛
言如是我聞多聚會比丘在迦梨講堂樹間
會坐為佛作衣今佛不久夏竟夏已盡佛自
說三月已竟作衣已當到多人處我聞是即
愁憂所食不覺味諸方不分別所聞善法不
復念所作世間業不復著所以者何甚久乃

復得見佛并慧清淨行比丘難提釋言已竟
佛便報難提釋難提若見我身若不見我身
若見清淨行比丘若不見清淨行比丘常當
行內五法何等五一者意常當有信捨不信
意二者常當清淨行捨不清淨行三者常當
樂布施捨慳貪四者常當有慧捨癡五者常
當多聞莫樂不聞難提是為內五事已當復
有六念何等六一念佛二念法三念比丘僧
四念戒五念施與六念天難提若慧弟子念
佛諸德佛為有是為如來為無所著為一切
覺為神行足為已快為有無量為無有上為
男子師為法御者為天人師為覺有是若天
若人若魔若梵若沙門若婆羅門為自慧證
身生處已盡為已著清淨行所為當自識但
有是身從後不受難提是時慧弟子意不著

慶十

十五

貪欲不著瞋恚不著愚癡便爲直意慧弟子
意已直已直意便得義便得法便見法便大
樂喜已喜便生樂從樂便身滅身已滅便得
安隱已得安隱便得定從定便如知如見是
爲苦諦是爲集是爲盡是爲苦滅向道者諦
難提若慧弟子在邪中爲直念有恨意便爲
捨意有所著便不受是爲慧弟子樂道迹爲
常念佛德難提若慧弟子念法德佛所說大
爲安隱爲可見爲無時可相授可得持慧者
讚可得出可飽可依從法得離所處難提是
時慧弟子意不著貪欲不著瞋恚不著愚癡
便爲直念慧弟子意已直已直意便得義便
得法便見法便大樂喜已喜便生樂從樂便
身滅身已滅便得安隱意從安隱便得定從
定便如知如見是爲苦諦是爲集是爲盡是

爲苦滅向道者諦難提若慧弟子在邪中爲
直念有恨意便爲捨意有所著便不受是爲
慧弟子樂道迹爲常念法德難提若慧弟子
念比丘聚德佛衆弟子爲有清淨爲有定爲
有脫爲有脫見慧爲有行爲有所得爲是世
間福田少施得福無有量若衆中有須陀洹
爲信有須陀洹若衆有斯陀舍爲信有斯陀
舍若衆有阿那舍爲信有阿那舍若衆有阿
羅漢爲信有阿羅漢是爲男子四雙賢者八
輩人中第一第十人中之剛爲人師爲人中應受
恭敬者是爲三界中最人難提是時慧弟子
意不著貪欲不著瞋恚不著愚癡便爲直意
慧弟子意已直已直意便得義便得法便見
法便大樂喜已喜便生樂從樂便身滅身已
滅便得安隱意從安隱便得定從定便如知

如見是爲苦諦是爲集是爲盡是爲苦滅向道者諦難提若慧弟子在邪中爲直念有恨意便爲捨意有所著便不受是爲慧弟子樂道迹爲常念比丘聚德難提若慧弟子自念戒德佛所施戒不可犯不可輕不可毀不可弄不可試慧者從戒得定從定便離愛意不著世間譬如石破終不復合難提是時慧弟子意不著貪欲不著瞋恚不著愚癡便爲直意慧弟子意已直已直意便得義便得法便見法便大樂喜已喜便生樂從樂便身滅身已滅便得安隱意從安隱便得定從定便如知如見是爲苦諦是爲集是爲盡是爲苦滅向道者諦難提若慧弟子在邪中爲直念有恨意便爲捨意有所著便不受是爲慧弟子樂道迹爲常念戒德難提若慧弟子自念施

與之德快哉我慶十已得作人於慳貪之中能自拔無有嫉之意爲常樂與爲信所與後必當得少施所得無量從施得無爲難提是時慧弟子意不著貪欲不著瞋恚不著愚癡便爲直意慧弟子意已直已直意便得義便得法便見法便大樂喜已喜便坐樂從樂便身滅身已滅便得安隱意從安隱便得定從定便如知如見是爲苦諦是爲集是爲盡是爲苦滅向道者諦難提若慧弟子在邪中爲直念有恨意便爲捨意有所著便不受是爲慧弟子樂道迹爲常念施與之德難提若慧弟子念諸天德第一照頭摩賴第二忉利第三燄第四兜術第五泥慢羅提第六般泥迷陀忉舍怨提若從信若從清淨若從聞若從施若從慧各有行得上是六天我亦能行五法若

信戒聞施慧從是因緣得生天上難提是時
慧弟子意不著貪欲不著瞋恚不著愚癡便
爲直意慧弟子意已直已直意便得義便得
法便見法便大樂喜已喜便生樂從樂便身
滅身已滅便得安隱意從安隱便得定從定
便如知如見是爲苦諦是爲集是爲盡是爲
苦滅向道者諦難提若慧弟子在邪中爲直
念有恨意便爲捨意有所著便不受是爲慧
弟子樂道迹爲常念諸天德佛說如是難提
釋大歡喜受著意常行是六念起座持頭面
著佛足禮

難提釋經

佛說馬有三相經

卷十

十八

後漢三藏法師支曜譯

聞如是一時佛在舍衛國祇樹給孤獨園佛
 便告諸比丘善馬有三相用入官可給御中
 王意得名為官馬何等為三相一者有善馬
 意自能走二者有力三者端正好色是為三
 相善馬中入官善人亦有三相自得善意名
 聞亦豪舉人敬難之可受人禮能福天下何
 等為三相有善人得意能走有力有端正色
 何等為善人得意能走有善人得意是苦如
 有知為是集為是盡敗為是道識如是善人
 得意為走何等為善人得意為力為有弊惡
 態當為斷盡力求之精進求者意棄惡未起
 弊惡態不復起未起善意當為起已起善意
 當為止不忘滅稍稍增多行意俱善行盡力

求制意棄惡如是善人得力何等為善人得
 意有色端正是聞有善人得意避五樂避弊
 惡能到四棄得行如是善人得意有色是為
 三因緣諦行善人得意名聞為能主舉人難
 之可取禮天下如是佛說如是

卷十

十九

佛說馬有三相經

佛說馬有八態譬人經

後漢三藏法師支曜譯

聞如是一時佛在舍衛國行在祇樹給孤獨園多比丘僧俱佛告諸比丘馬有弊惡態八何等八一態者解羈韁時便掣車欲走二態者駕車跳踉欲嚙人三態者便舉前兩脚掣車走四態者便蹋車軛五態者使人立持軛摩抄車却行六態者便傍行邪走七態者便掣車馳走得濁泥抵止住不復行八態者懸筓餒之熟視不肯食其主牽去欲駕之遽哈噏噓欲食不能得食佛言人亦有弊惡態八何等爲八一態者聞說經便走不欲聽如馬解羈韁掣車走時二態者聞說經意不解不知語所趣向便踴跳踉不欲聞如馬駕車時跳踉欲嚙人時三態者聞說經便逆不受如

馬舉前兩脚掣車走時四態者聞說經便罵如馬蹋車軛時五態者聞說經便起去如馬人立持軛摩抄車却行時六態者聞說經不肯聽顛頭邪視耳語如馬傍行邪走時七態者聞說經便欲窮難問之不能相應答便死抵妄語如馬得濁泥便止不復行時八態者聞說經不肯聽及念淫泆多求不欲聽受死入惡道時乃遽欲學問行道亦不能復得行道如馬懸筓餒之熟視不肯食其主牽去欲駕之乃遽哈噏噓亦不得食佛言我說馬八態惡人亦有八惡態如是諸比丘聞經歡喜作禮而去

佛說馬有八態譬人經

佛說相應相可經

西晉三藏法師法炬譯

佛在舍衛國請諸比丘比丘即到佛告比丘
比丘應唯然從佛聞佛便說是不聞者不聞
者俱相類相聚相應相可多聞者多聞者俱
相類相聚相應相可貪婬者貪婬者俱相類
相聚相應相可不貪婬者不貪婬者俱相類
相聚相應相可瞋恚者瞋恚者俱相類相聚
相應相可不瞋恚者不瞋恚者俱相類相聚
相應相可愚癡者愚癡者俱相類相聚相應
相可慧者慧者俱相類相聚相應相可布施
者布施者俱相聚相類相應相可慳貪者慳
貪者俱相類相聚相應相可少欲者少欲者
俱相類相聚相應相可多欲者多欲者俱相
類相聚相應相可不持戒者不持戒者俱相

類相聚相應相可持戒者持戒者俱相類相
聚相應相可難給者難給者俱相類相聚相
應相可易給者易給者俱相類相聚相應相
可不知足者不知足者俱相類相聚相應相
可知足者知足者俱相類相聚相應相可不
自守者不自守者俱相類相聚相應相可自
守者自守者俱相類相聚相應相可佛說比
丘如是慧人當分別是因緣可行者行之不
可行者莫行佛說如是比丘受行著意

佛說相應相可經

音釋

膺 於計切陰翳也
趺 測力切遮也
疍 女八切柳切
羈 羈居切羈居
躡 居直切居直
跳 跳徒切跳徒
踟 張切張切
齒 倪結切倪結
蹋 蹋徒切蹋徒
軛 丁切車輪也
抄 抄素切抄素
翁 翁許切翁許
啞 同聲時制切同聲時制
頤 匹米切頤也

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>

